

ՄՈՒՍԱ ԼԵՌԱՆ ՀԵՐՈՍԱՄԱՐՏԸ ԵՎ ՀԱՅ ԿԱՆԱՅՔ

ՓԱՇԻՆՅԱՆ Ռ. Հ.

Կիլիկիայի հարավում՝ Տավրոսի Ամանոս լեռնաշղթայի հարավարևմտյան փեշերին է Մուսա լեռը՝ Դամլաջըք գագաթով: Մուսա լեռան լանջերին սփռված էին հայկական վեց գյուղեր՝ Յոդուն Օլուկ, Խդրբեկ, ՎագրՖ, Հաջի Հաբիբլի, Բիթիաս, Քերուսիե: Ենթադրություն կա, որ հայերը դեռ մինչև Տիգրան Երկրորդը հաստատվել են Ասորիքում, Անտիոքում ու Սելևկիայում¹: Եվ այստեղ հաստատված հայկական բնակավայրերը պարկեշտ, աշխատասեր և ձեռներեց բնակիչներով, ինչպես նաև իրենց քաղաքական ազդեցությամբ մեծ կշիռ ունեին դեռ Տիգրան Մեծի օրոք: Հետագայում տարբեր տեղերից գաղթած և քաղաքական ինչ-ինչ հանգամանքներից մղված՝ հայերը եկել ու հաստատվել են Մուսա լեռան շուրջը՝ իրենց ենթարկելով ըմբոստ ժայռերն ու ապառաժները: Բազմաթիվ դժվարություններ հաղթահարելով՝ նրանք պահպանել են գրաբարով համեմված իրենց բարբառը: Այդ գյուղախմբի ավելի քան 6000 բնակիչներ զբաղվել են երկրագործությամբ, անասնապահությամբ, շերամապահությամբ, մեղվաբուծությամբ և տարբեր արհեստներով: Ամեն գյուղ ունեցել է իր դպրոցն ու եկեղեցին: Եվ ահա վրա է հասնում 1915-ի չարագույժ ապրիլը, երբ արդեն Արևմտյան Հայաստանը գալարվում էր արյան ու կրակի բոցերի մեջ:

Մուսա լեռան հայությունը նույնպես ենթարկվեց օսմանյան զորահավաքին՝ իբրև տուրք տալով իր ընտիր կտրիճներին թուրքական բանակին: Նրանք գնացին ծառայելու «վաթանին», որպեսզի իրենց ընտանիքները տարագրության արյունոտ ճանապարհ չանցնեն: Ծառայության վայրը հասնելու ճանապարհին թուրք արյունարբու զինվորները նրանց հազար ու մի չարչարանքների են ենթարկում: Վերջապես հասնում են Հալեպ: Նրանց զենք չեն տալիս: Հայ զինվորները հանդուրժում են բազում անարգանք ու չարչարանք՝ հանուն իրենց ընտանիքների և համագյուղացիների հանգրստության:

Հալեպում նրանք ականատես եղան հայ տարագիրների ահավոր տառապանքներին: Հազարավոր հայեր՝ ծեր, երիտասարդ, աղջիկ, կին, երեխա, ծայրագույն թշվառության հասած, հազիվ իրենց մերկությունը ծածկող ցնցոտիների մեջ, բերվում էին Հալեպ՝ Դեր Զորի անապատներ քշելու համար: Ամենուրեք լաց ու կոծ էր, ճիչ, աղաղակ, սարսափելի ձայներ: Ոմանք անկարող էին քայլել, ուժասպառ վայր էին ընկնում հենց փողոցներում, մայթերի վրա, ուրիշներն էլ գավազանի հարվածների տակ իրենց շունչն էին փչում: Մուսալեռցի զինվորների համար շատ դժվար էր ականատես լինել այդ զարհուրելի տեսարաններին: Նրանք համոզված էին, որ այդ նույն

¹ «Մուետիա» անունը հնում Սելևկիա մայրաքաղաք-նախահանգստի անունից է, որի ավերակները գտնվում են այդ վայրերում:

է սպասվում ողջ հայությանը, հետևաբար հերթը շուտով մուսալեոցիներինն է: Նրանցից մի քանիսին հաջողվում է փախչել, վերադառնալ հայրենիք և մանրամասն պատմել իրենց տեսածի մասին²:

Այդ օրերին էլ Սուեփա է հասնում Զեյթունի բողոքական եկեղեցու քարոզիչ Տիգրան Անդրեասյանը, որը բնիկ Յողունօլուկցի էր և հազիվ էր փրկվել բռնագաղթից ու վերադարձել իր ծննդավայրը: Նա պատմում է Զեյթունի հայության դժոխային կացության մասին, ժողովրդին հորդորում է չընդունել բռնագաղթի դաժան հրամանը, ըմբոստանալ, միավորվել և բարձրանալ Մուսա լեռան գագաթը, զենքի դիմել, մեռնել փառքով ու պատվով³:

Քեսապն ու արվարձանները 1915 թ. հուլիսի 28-ին ստացան տարագրության պաշտոնական հրահանգ⁴: Կասկած չկար, որ շուտով մուսալեոցիներն էլ կստանան: Պետք էր վճռական միջոցների դիմել: Հուլիսի 29-ին Յողուն Օլուկ գյուղի քահանա Աբրահամ Տեր-Գալուստյանի տանը տեղի է ունենում 6 գյուղերի ներկայացուցիչների ժողով, որտեղ որոշվում է լեռ բարձրանալ և դիմել զինված ինքնապաշտպանության՝ հույսը դնելով իրենց հին և մասամբ էլ նոր զենքերի վրա⁵: Հուլիսի 30-ին ստացվում է մուսալեոցիների տեղահանության մասին Անտիոքի գայմագամի հրամանը. մինչև 7 օրվա ժամկետ էր տրվում՝ տուն ու տեղ թողնելու և կառավարության նշած վայր մեկնելու համար⁶:

Մինչ այդ՝ օգոստոսի 3-ին, ժողովուրդն արդեն սկսել էր լեռ բարձրանալ: Դա տառապալից վերելք էր: Կանայք, երեխաները, մեծահասակները, իրենց կարողություններից ավելի բեռնավորված, բարձրանում էին լեռն ի վեր: Մարդիկ տանում էին նաև ընտանի կենդանիների: Վերապրելու բնագոր ուժ էր տալիս նրանց: Առաջին հերթին լեռ են բարձրանում Յողուն Օլուկի, Խդրբեկի և Վագրֆի գրեթե ամբողջ բնակչությունը և Քեբուսիեի 17 ընտանիքները: Մինչդեռ բիթիացիների և հաջիհաբիբիցիների մեծ մասը մնացել էր գյուղերում⁷: Արդեն օգոստոսի 2-ին ավելի քան 4 հազար մարդ Մուսա լեռան վրա փայտացախներից ու լեռնաքարերից պատրաստում էին իրենց հովիկները՝ անձրևից ու խոնավությունից պաշտպանվելու համար: Ավելի ուշ սկսում են զբաղվել նաև զորանոցների շինությամբ:

Թուրք մյուղիի Խալիտը մուսալեոցիներին արդեն երրորդ գրությունն է ուղարկում, պահանջում է իջնել լեռան բարձունքից՝ խոստանալով, որ կառավարությունը կների նրանց

անխոհեմ քայլը:

² Պուրսալեան Յ. Գ., *Սուեփոյ հերոսամարտը (Հայրենիք, Բոստոն, 1929, N 9, էջ 115)*:

³ Վեր. Անդրեասեան Տ., *Զեյթունի տարագրութիւնը և Սուեփոյ ապստամբութիւնը, Հալէպ, 1935, էջ 38*:

⁴ Յուշամատեան Մուսա լեռան, *Բեյրութ, 1970, էջ 324*:

⁵ Նույն տեղում, էջ 324:

⁶ Նույն տեղում, էջ 326:

⁷ Պուրսալեան Յ. Գ., *Մուսա լեռան հերոսամարտը, Այնճար (Լիբանան), 2004, էջ 39*:

Հաջորդ գրության մեջ նա արդեն սպառնում էր գորք բերել և կռիվ սկսել⁸:

Սկզբում մուսալեռցիները տեղավորվում են 3 տարբեր շրջաններում. Գըզըլ Չայ, Գուզ Ճըղագ և Տամլաճըգ: Ընտրում են զինվորական և ներքին գործերը կառավարող մարմիններ: Դեռ նոր էին խրամատները պատրաստել, պահակներ նշանակել ու իրենց պաշտոնի գլուխն անցել, երբ օգոստոսի 7-ին ընդհանուր ժողով հրավիրելու անհրաժեշտություն եղավ⁹: Ժողովը հրավիրվեց Թաթար-Ալանկ կոչվող դաշտի մեջ, որին մասնակցում էին 3 շրջանների ներկայացուցիչներն ու զինվորական մարմնի կառավարիչները, նաև Բիթիասի և Հաջի Հաբիբլիի ներկայացուցիչները: Ժողովը նոր էր սկսել իր աշխատանքները, երբ հանկարծ լուր եկավ, որ մյուռիի Խալիտի առաջնորդությամբ Եոլ Աղըզլյի կողմից կռիվն սկսված է. թուրք զինվորները առաջ են շարժվում: Բոլոր երիտասարդներն ու զենք վերցնելու կարողություն ունեցողները շարժվում են դեպի կովի վայրը: Երիտասարդները երգելով էին առաջ շարժվում: Դա Մուսա լեռան ինքնապաշտպանության առաջին կռիվն էր, առաջին մարտը թուրքական զորքի դեմ: Հոգեբանական բարդ իրավիճակ էր հայ մարդու համար: Դարերով թուրքական իշխանության լծի տակ ապրող հայը զենք էր բարձրացրել զորքի դեմ. դա խիզախություն պահանջող քայլ էր: Թշնամին հարձակվում էր, կյանքի ու մահվան հարց էր: Հայերն ուզում էին կոտորել բոլորին, որ ապացուցեն, որ «ռայա» համարված հայն էլ գիտե կռվել: Ջարհուրելի կրակ էր թափվում երկուստեք: Թշնամին իգուր տեղը ռազմամթերք էր փրչացնում: Ոչ մի գնդակ իր նպատակին չէր հասնում: Թշնամին ջանք էր թափում աջ թևից շրջապատել հայ կովոդներին, սակայն ամեն մի հանդգնություն թանկ էր նստում նրանց վրա: Կռիվը շարունակվում էր արևի կիզիչ ճառագայթների տակ: Արևը այրում էր նրանց ճակատները՝ հետզհետե ավելի զգալի դարձնելով ծարավը, որը թմրեցնում էր կովոդների ջղերն ու թուլացնում բազուկները:

Այդ կռվի մեջ հերարձակ մի կին դիրքից դիրք էր անցնում, ջուր բաժանում մարտիկներին: Կռվող հայ տղամարդիկ խնդրում էին նրան զգուշանալ սլացող բյուրավոր գնդակներից և թաքնվել քարի հետևում, բայց կինը հանդիմանական շեշտով ասում էր. «Զարկեք, եղբայրներ, երբեք մի վախնաք, այդ վատերուն գնդակը հայը չի կրնար սպանել: Զարկեք անխնայ, թող օրհնեալ ըլլան ձեր բազուկներն ու զենքերը: Զարկեք...»¹⁰: Թուրքի գնդակից չվախեցող այս հայուհին Յոդուն Օլուկ գյուղից Ծաղեր Տեր-Մովսեսյանն էր: Շուտով մյուս վայրերից էլ օգնության եկան: Կռիվը տևեց 6 ժամ: Դա առաջին մարտական մկրտությունն էր, որն ավարտվեց հայերի կատարյալ հաղթանակով: Մուրթն էր, երբ թշնամին խուճապահար նահանջեց՝ տանելով բազմաթիվ դիակներ և ավելի վիրավորներ:

⁸ Յուշամատեան Մուսա լեռան, էջ 328:

⁹ Վեր. Անդրեասեան Ս., Ձեյթունի տարագրությունը և Մուկտիոյ ապստամբությունը, Հալեպ, 1935, էջ 57:

¹⁰ Պուրսալեան Յ. Գ., Մուկտիոյ հերոսամարտը, էջ 42:

Մուսալեռցիները կորուստ և վիրավոր չունեցան: Կովում տարած հաղթանակը խրախուսեց նրանց: Թշնամին շտապում էր օր առաջ ոչնչացնել ապստամբներին: Մյուդիր Խալիտը այլևս էժան հաղթանակի և փառքի մասին չէր մտածում. նրա միակ մտահոգությունը շարժումը սաղմի մեջ խեղդելն էր:

Երկրորդ հարձակումն սկսվեց օգոստոսի 10-ի վաղ առավոտյան Հաջի Հաֆիբլի գյուղի կողմից: Կովին մասնակցում էր 5.000 զինվոր՝ երկու լեռնային թնդանոթների և հրետանու ուղեկցությամբ¹¹: Ռումբերի տարափ էր դիրքերի վրա, որն իր նպատակին էր ծառայում: Սկզբում մուսալեռցիները չէին պատասխանում, սպասում էին, որ թշնամին մոտենա, որ ամեն մի գնդակը մեկ թուրք զինվորի կյանք արժենա: Երկուստեք բացվեց դժոխային կրակ: Հայ մարտիկների արձակած անվրեպ գնդակներից թշնամին մեծ կորուստներ ունեցավ: Ռումբերի ավերումներին չդիմանալով՝ հայ մարտիկներն սկսեցին հետ քաշվել՝ ավելի հարմար դիրքեր գրավելու համար: Եղանակը աստիճանաբար փոխվեց, սկսեց հորդառատ անձրև տեղալ, որը մեծ չափով դժվարացրեց հայ կռիվողների վիճակը մեծ մասամբ անգործածելի դարձան հասարակ որսորդական հրացանները: Բայց մուսալեռցիներն ունեին նաև հունական կրա-հրացաններ և գունտազրը մաուզերներ, որոնցով կարող էին կրակ թափել թշնամու գլխին: Հայ զինագործ վարպետները չպայթող ռումբերն օգտագործում էին թշնամու դեմ:

Որոշ ժամանակ երկկողմ լռությունից հետո կռիվը նորից բորբոքվեց: Անձրևը շարունակում էր տեղալ՝ է՛լ ավելի դժվարացնելով մուսալեռցիների վիճակը: Օգտվելով աննպաստ պայմաններից՝ թըշնամին առաջ էր շարժվում՝ հասնելով «Օմարի գետին» կոչված վայրին: Հայ կռիվողները մահասփյուռ գնդակներով կասեցնում էին թշնամու առաջխաղացումը: Թշնամին, նոր օգնական ուժեր ստանալով, բուռն հարձակման անցնելով, կարողացավ հասնել մինչև Թաթար-Ալանկ: Մյուս կողմից էլ վտանգավոր վիճակ ստեղծվեց մուսալեռցիների Գրզըլ-Չայ բանակատեղում: Ուժեղացնելով թնդանոթային կրակը՝ ռումբերն ընկնում էին հյուղակների մոտ՝ ավերելով մի քանիսը: Ժողովրդի մի մասը, թողնելով Գրզըլ-Չայի բանակատեղը, փոխադրվեց Գուգ-Ճրդագ, իսկ մեծամասնությունը փոխադրվեց Տամլաճրգ, որը դարձավ ամենամեծ կենտրոնատեղին: Մուսալեռցիները գերմարդկային ճիգով շարունակում էին դիմադրություն ցույց տալ: Այս կռվի ժամանակ բացառիկ քաջություն ցուցաբերեց և ծանր վիրավորվեց Հակոբ Ղարազյոզյանը, որին ժողովուրդը խիզախության համար «առյուծ» - «Ըլլեռն» անունը տվեց: Նա ոչ միայն քաջ կռվող էր, այլ նաև հսկայական աշխատանք կատարեց ինքնապաշտպանության գործի կազմակերպման համար. նա էր, որ առաջ քաշեց ինքնապաշտպանության գաղափարը: Ծանր վիրավոր վիճակում անգամ Հ. Ղարազյոզյանը դուրս չէր գալիս մարտադաշտից: Նրա արձակած գնդակներից գետնին էին տապալվում թուրք ասկյարները: Երբ ընկերները նրան դուրս էին հանում

¹¹ Յուշամատեան Մուսա լեռան, էջ 332:

կռվից, խնդրում էր իրենով չգրադվել, այլ գնալ և շարունակել կռիվը: «Կաղաչեմ ինձմով մի զբաղի՞ք... դուք գացե՛ք և թշնամիին դիմադրեցե՛ք: Մանավանդ մի տարակուսի՞ք վերջնական հաղթանակի վրա: Մերը պիտի ըլլա ան»¹²:

Հակոբ Ղարազյոզյանը եղավ Մուսա լեռան հերոսամարտի առաջին նահատակը: «Օմարի գետին» ճակատամարտում մեծ հերոսություն հանդես բերեց նաև Յոդունօլուկցի քաջամարտիկ Պետրոս Գալստյանը, որն իր դիրքից հաջորդական 5 գնդակներով իրար հետևից գետնին տապալեց 4 թնդանոթաձիգների: Ի վերջո, թշնամին սարսափահար լքեց թնդանոթը և փախուստի դիմեց: Թուրք հազարապետը, տեսնելով թնդանոթաձիգների ընկնելը, վախեցած նահանջի հրաման է տալիս. «Ասոնց հաղթել անկարելի է, գերանի մը ծայրը դրված ասեղ մը անվրեպ կրնան հարվածել, հերիք է, որ տեսնեն զայն»¹³: Այս կռվի ժամանակ մի խումբ պիթիասցիներ, որոնք դեռ չէին հասցրել տեղավորվել, ճանապարհի վրա գոհվեցին կամ գերի ընկան:

Մարտը շարունակվեց մինչև իրիկուն: Հայ կռվողներն ուժգին հարձակումով գրոհեցին թշնամու վրա և, խուճապի մատնելով նրան, նորից հետ քշեցին մինչև «Օմարի գետինը»: Երկրորդ ճակատամարտը տևեց 12 ժամ: Հակառակ աննպաստ, անձրևային եղանակին՝ լավ հանդերձավորված ու զինված թշնամին չկարողացավ ընկճել մուսալեռցիներին: Այս կռվում թշնամին տվեց 100-ից ավելի սպանված և մի քանի անգամ ավելի վիրավոր: Մուսալեռցիներն ունեցան 4 սպանված և երկու վիրավոր¹⁴: Հայերն անհամբեր լուսաբացին էին սպասում, որ հարձակման անցնեն: Թշնամին, օգտվելով թանձր մառախուղից, կարողացավ փախուստի դիմել:

Ժողովուրդը հրճվանքի մեջ էր: Հաղթանակը կատարյալ էր: Օգոստոսի 11-ին՝ հաղթանակի հաջորդ օրը, եղանակը փոխվեց. պայծառ օր էր: Կանայք շտապեցին թրջված անկողիններն ու շորերը չորացնել: Միաժամանակ աշխատում էին ավարտին հասցնել տնակների կառուցման աշխատանքները, որոնք անավարտ էին մնացել կռիվների պատճառով, ինչպես նաև ուտելիք պատրաստել կռվողների համար:

Ճիշտ է, երկրորդ ճակատամարտն էլ ավարտվեց մուսալեռցիների հաղթանակով, սակայն կռիվների ընթացքում բացահայտվեցին շատ թերություններ: Ամենից առաջ ռազմական ուժերը ցրված էին մի քանի տեղերի վրա. դժվար էր փոքրաթիվ ուժերով այն կառավարել: Հարկավոր էր ուժերը կենտրոնացնել մի տեղում: Գրգըլ-Չայի բանակատեղը հենց կռվի ընթացքում դատարկվեց, Գազ Ճըղագի բարձր դիրքը ենթակա էր ռմբակոծման վտանգի: Ժողովրդի մեծամասնությունը հենց կռվի ընթացքում հավաքվեց Տամլաճըզի մեջ, որը ցածր էր և բլուրներով շրջապատված: Պիթիասցիներն էլ հաստատվել էին «Գափլան տուզաղը» կոչված վայրում, որը Տամլաճըզի

¹² Նույն տեղում:

¹³ Նույն տեղում:

¹⁴ Պուրսալեան Յ. Գ., *Մուսալեռի հերոսամարտը*, էջ 46:

և Գագ Ճըղազի միջև էր: Այս երեք կենտրոնների տեղական ժողովները միավորվելով ստեղծեցին նոր կենտրոնական վարչական ժողով և նոր Զինվորական կենտրոնական վարչություն: Կենտրոնական վարչական ժողովի ատենապետը պատվելի Տիգրան Անդրեասյանն էր, Զինվորական ընդհանուր վերահսկիչը՝ 22-ամյա Մովսես Տեր-Գալստյանը (Ա. Լեյլանի): Կենտրոնական վարչական ժողովն ամեն օր հավաքվում էր: Այն զբաղվում էր դատավարություններով, խիստ պատժում իրենց պարտականությունների մեջ թերացողներին:

Զինվորական կազմակերպությունը բաղկացած էր 44 մարտական խմբերից, որոնց կեսը պահեստի գորանոցներում էին, իսկ մյուս մասը՝ դիրքերում: Յուրաքանչյուր խումբ ուներ իր տասնապետը: Դիրքերի առավելությունները հաշվի առնելով՝ որոշում են ժողովրդին հավաքել Տամվաճրզի մեջ: Գագ Ճըղազը ավելի անառիկ էր, սակայն Տամվաճրզը ավելի մեծ առավելություն ուներ. ծովը դիմացն էր: Ծովը ներշնչում էր փրկության հույս: Որտեղ էլ որ բնակվեին մարտիկները, իրենց պարտականությունները կատարում էին Տամվաճրզի կենտրոնական գորանոցում:

Հայերի իշխանության տակ 115 կմ² տարածք էր, որը հսկողության տակ պահելը մեծ դժվարություն էր: Որոշվեց ստեղծել 3 արագաշարժ կամավորների խումբ՝ 33 հոգուց բաղկացած, յուրաքանչյուրում՝ 11 հոգի, անհրաժեշտության դեպքում խմբերը բաժանվում էին այնքան մասերի, որքան անհրաժեշտ էր կռվում շտապ օգնության հասնելու համար: Այդ խմբերում ընդգրկված էին ամենաքաջերն ու հանդուգները: Կամավորների կենտրոնական վայրը Թաթար-Ալանկն էր, որը մոտ էր բոլոր դիրքերին: Կար պատանի սուրհանդակների խումբ՝ «թելեֆոնի տղաք» անունով, որոնք 10-12 տարեկան տղաներ էին և գնդակների տարափի տակ ապահովում էին կապը: «Կիները, առանց կազմակերպության մեջ մտնելու՝ կը ծառայեին ջուր և պաշար հասցնելով խրամատները: ...Տունը ջուր բերել իրենց պարտականությունը եղած էր միշտ: Եվ հիմա ջուրերու ակերը խիստ հեռի էին բնակարաններեն: Երբեմն ... մեկ ու կես ժամեն ոչ պակաս ժամանակ պետք էր ակեն ջուր առնելու և վերադառնալու համար:

Բնական է, որ լեռան վրա ջրաղաց ալ չկար, ուստի կիներուն բաժին էր հացահատիկը հատիկ հատիկ խոշոր ալյուրի վերածել երկնաքարերու միջոցով, և ապա հաց շինել»¹⁵:

Երկրորդ ճակատամարտից հետո հարաբերական հանգստություն էր տիրում. օգոստոսի կեսերին Ռամազան բայրամի օրեր էին, և թշնամին նոր հարձակում չձեռնարկեց (իհարկե, տեղական ընդհարումներն անպակաս էին): Առայժմ մուսալեռցիները սննդամթերքի պակաս չունեին, չնայած Կենտրոնական վարչական մարմինը նախատեսել էր ծայրահեղ դեպքում հաշվի առնել ժողովրդի մոտ եղած սննդամթերքը, անասունները և յուրաքանչյուրի համար հավասար սննդաչափ որոշել, սակայն դրա անհրաժեշտությունը չեղավ: Ա-

¹⁵ Վեր. Անդրեասեան Տ., *Զէյթունի տարագրութիւնը և Սուէտիոյ ապստամբութիւնը*, էջ 73:

մառվա ամիսներին հնարավոր էր լինում սննդամթերք ձեռք բերել: Խմբեր էին կազմում, որոնց մեջ մեծ թվով կանայք՝ պարկերով, զինյալ պահակների ուղեկցությամբ, մտնում էին մոտակա գյուղերի այգիներն ու պարտեզները, քաղում էին զանազան պտուղներ (թուզ, սալոր, ձիթապտուղ, խաղող և այլն), բարձրանում լեռ, դաշտերից էլ հավաքում էին ցորեն, գարի, եգիպտացորեն, ոսպ, սիսեռ և այլն: Լինում էին բախումներ թուրքական կայազորի հետ: Այս ձևով ժողովուրդն ունենում էր թարմ մրգեր, իսկ ցորենն ու գարին կանայք չորացնում էին և երկանքներով աղում, վերածում հացի:

Թշնամին չէր հաշտվում մի բուռ ապստամբներից պարտություն կրելու փաստի հետ, անընդհատ մտածում էր նրանց ոչնչացնելու մասին: Մուսալեռցիները հասկանում էին, որ երկար ժամանակ չեն կարող կռվել թուրքական կանոնավոր բանակի դեմ: Աստիճանաբար պակասում էին ռազմամթերքն ու ուտելիքը: Նրանք հույս ունեին, որ դաշնակից պետությունները կօգնեն, որ ծովից մարտանավ կերևա և օգնության կհասնի իրենց: Հակառակ դեպքում ելքը փառավոր մահն էր լինելու: Ուշադրություն գրավելու համար նրանք լեռան ծովահայաց եզրին բարձրացրին երկու մեծ սպիտակ դրոշակներ: Մեկի վրա հայ կանայք կարմիր կտորից կարեցին կարմիր խաչի նշանը, մյուսի վրա անգլերեն տառերով ասեղնագործեցին. «Քրիստոնյաները վտանգի մեջ են»¹⁶: Դրանց շուրջ անընդհատ վառվում էին խարույկներ՝ անցնող նավերի ուշադրությունը գրավելու համար: Երկու դրոշակների մոտ սահմանված էր մշտական հերթապահություն: Մարտանավ տեսնելուն պես պահակները պետք է շարժեին դրոշակները: Մուսալեռցիները իրենց ծանր վիճակի մասին պատրաստել էին նաև դիմում-աղերսագիր՝ ուղղված դաշնակից պետություններին (Անգլիա, Ֆրանսիա, Իտալիա, Ամերիկա, Ռուսաստան), որ նավ երևալու դեպքում պետք է նրանց հասցնեն փորձված լողորդ Մովսես Գրբըզյանը¹⁷:

Դիմում-աղերսագիրը դրված էր թիթեղյա ամանի մեջ՝ բերանն անագով ամրացված: Աղերսագրում, որ անգլերեն գրել էր պատվ. Տ. Անդրեասյանը, ասված էր. «... Մենք, Եօդուն – Օլուզի և ուրիշ հինգ գյուղերու բնակչությունը... մոտավորապես 6.000 հոգի քաշված ենք Ճեպել – Մուսայի Տամլաճըզ կոչված կենտրոնը...: Մենք հոս ապաստանած ենք, թրքական բարբարոսությունեն, ... կոտորածեն և մահեն գերծ մնալու համար: ... Վստահ ենք, որ դուք ծանոթ եք թուրքին ներկա բնաջնջման քաղաքականության, զոր ան կրգործադրե... մեր ցեղին վրա: Հայերը ցրելու պատրվակով, իբր թե արգելելու համար անոնց ապստամբությունը... հայ քրիստոնյաները կվտարվեն իրենց տուներեն, կը տարագրվեն իրենց օջախներեն... ու կդրկվեն ... անծանոթ, անապատ վայրեր»:

Ապա նկարագրելով ճանապարհին հայերի ոչնչացումն ու ողբերգական վիճակը՝ խնդրում են. «... ազատեք մեր կյանքն ու պատիվը: Հաճեցեք, ...փոխադրել մեզ Կիպրոս կամ

ուրիշ

ազատ

երկիր

մը:

¹⁶ Յուշամատեան Մուսա լեռան, էջ 344:

¹⁷ Նույն տեղում, էջ 345:

Մեր ժողովուրդը ծույլ չէ, կրնայ իր ապրուստը ճարել, եթե գործ տրվի իրեն: Եվ կամ, եթե այսքանը կարելի չէ, հաճեցեք փոխադրել գոնե մեր կիները, ծերերն ու մանուկները, և մեզի տվեք ուտելիք, զենք և ռազմամթերք, որպեսզի Ձեզի հետ, ձեր կողքին, կովինք թրքական ույծերուն դեմ. ...Կը խնդրենք, Տեր, մի թողուք, որ ոչնչանանք: Ազատեցեք մեր կյանքը, ազատեցեք մեր պատիվը, քանի դեռ ուշ չէ:

Ձերդ անկեղծորեն

Ի դիմաց բոլոր քրիստոնյաներուն

Տիգրան Անդրեասյան

Ճեպել-մուսա /10/ 20 օգոստոս 1915»¹⁸:

Օգոստոսի 15-ին՝ կիրակի առավոտյան, գորանոցից հեռու գտնվող ծառագարդ բլրակի վրա պատարագ է մատուցվում: Ժողովուրդը լուռ աղոթում էր: Հանկարծ մունետիկները կովի ահագանգ հընչեցրին: Ժողովուրդն արագ դիմեց հայրենի լեռան վտանգված դիրքերը՝ հարձակվող թշնամուն հակահարված տալու համար: Տղամարդկանց հետ կանայք էլ, հրացաններն ուսերին, խմբով վազեցին դիրքերը՝ կովելու: Մի քանի կանայք էլ, թիթեղներն ու կուծերն առած, շտապեցին ջուր հասցնելու կովողներին¹⁹: Թշնամին 5.000 զորքով ու մի այդքան էլ թալանի տենչով բռնված խուժանով առաջ էր շարժվում: Թուրքական բանակի հրամանատարն էր Ֆահրի փաշան: Թշնամու ուժերը բաժանված էին վաշտերի, որոնք հարձակվում էին մի քանի տեղերից: Անդադար լսվող թնդանոթների որոտին, շեփոռների կանչին, հրացանների պայթյուններին հայ կովողները չէին պատասխանում: Նրանք ուզում էին, որ թշնամին շատ մոտենա, որպեսզի արձակված գնդակները նպատակին ծառայեն: Մանավանդ խնայողությամբ էր պետք գործածել փամփուշտները: Մուսա լեռան փեշերին դժոխային կրակ տեղալով՝ թշնամին կամաց-կամաց առաջ էր շարժվում դեպի առաջապահների դիրքերը: Մի փոքրը առաջանալուց հետո թշնամին բաժանվեց երկու մասի՝ երկու տարբեր ճակատների վրա հարձակվելու համար:

Առաջին ու մեծ գորախումբը իր արշավանքն ուղղեց դեպի Թաթար-Ալանկ՝ Մուսա լեռան սիրտը: Տագնապ հայտարարվեց: Ոտքի կանգնեցին բոլորը՝ տղամարդիկ, կանայք, ծերերը, պատանիները: Նրանք մտան կովի այդ հսկա խառնարանի մեջ՝ կենաց ու մահու պայքար մղելու համար: Պետրոս Սըգայանի ընտանիքի բոլոր անդամները կովի մեջ էին: Այստեղ էին Պետրոսը, կինը, տղաները՝ Կարապետը, Եսային, Փանոսը, Միսակը և աղջիկը: Պետրոսը, ձեռքն առնելով թշնամու արձակած, բայց չպայթած ռումբը, թշնամու կողմը նայելով, հեզանքով բղավում էր. «Նայեցեք ձեր ռումբերուն հետ կը խաղանք իբրև սովորական գնդակներ»²⁰: Տագնապալի այդ բույներին կովողների մեջ էին Վարդեր Զեյթյանը, Օաղեր Տեր-Մովսեսյանը, Շուշան Գապայանն իր ամուսնու՝ Պողոս Գապայանի

¹⁸ Նույն տեղում, էջ 348:

¹⁹ Նույն տեղում, էջ 350:

²⁰ Նույն տեղում, էջ 381:

հետ, Մանուշակ Մանուկյանը (Եաղուբյան), Եղիսաբեթ Սըգայանը²¹: Շուշանն անձնվեր ու անվեհեր մի կին էր, մահվանը նայում էր ամենայն հանդարտությամբ և սառնասրտությամբ: Նա համոզված էր, որ իրենց գենքերին և անատիկ լեռներին ապավինելով՝ ի վերջո կկարողանան հաղթական դուրս գալ կենաց ու մահու այդ արյունալի պայքարից: Նա միշտ ամուսնու կողքին էր: Կովի վտանգավոր պահին Վարդեր Զեյթյանը, սափորը ուսին, եղնիկի արագաշարժությամբ, դիրքից դիրք վազելով, ջուր էր բաժանում կովոդներին: Հանկարծ գնդակը ծակում է ջրամանը: Հերոսուհին, զայրությից կրակ ու բոց կտրած, հանդիպակաց պուրակների մեջ վիստացող զինվորներին դառնալով, բղավում է. «Հե՛յ, նամերտնե՛ր, ձեր գնդակը կրնայ կուծա ծակել, սիրտս չի կրնար...»²²:

Թնդանոթները կրկին ու կրկին ոմբակոծում էին բարձունքը, իսկ հայերը կատակներ էին անում և ռազմաշունչ երգեր երգում: Մուսալեռցիները սկզբում կարծում էին, որ թշնամին Գըզըլճայի և Մավգուլ-Օլուգի, ինչպես նաև Տամլաճըզի մեծ ջրի կողմից չի հարձակվի, որովհետև այդտեղ դիրքերն անատիկ էին՝ շրջապատված սարերով: Ժողովրդին անջուր թողնելու միտումով թուրքերը մեծ ուժերով փորձեցին գրավել Մավգուլ-Օլուգի ջրի ակը, սակայն ուժեղ դիմադրության հանդիպեցին: Տամլաճըզի և մեծ ջրի ուղղությամբ հարձակվողներն էլ նույն բախտին արժանացան: Բացառիկ հերոսություն ցուցաբերեցին կանայք, աղջիկները, որոնց օգնում էին պատանիները: Նրանք Մանուշակ Մանուկյանի առաջնորդությամբ ժայռի բեկորներ, մեծ-մեծ քարեր էին գլորում մագլցել ձգտող թըշնամու գլխին՝ թույլ չտալով, որ մոտենան գլխավոր բանակատեղին: Նրանք ստիպում էին թշնամուն նահանջել²³:

Թշնամին կատաղությամբ շարունակում էր հարձակումը Թաթար-Ալանկի ուղղությամբ: Մյուս ճակատներում հայ կովոդները դիմադրում էին և թույլ չէին տալիս թշնամուն մի քայլ անգամ առաջ գալու: Թնդանոթի ռումբեր ու անհաշիվ գնդակներ տեղալով՝ թուրքերին հաջողվում է գրավել հայերից մի քանի դիրքեր: Չնայած հերոսական դիմադրությանը՝ թշնամին առաջ էր շարժվում, մոտենում էր վերջին դիրքին՝ Մահվան բլուրին, գնդակների տարափ թափելով մուսալեռցիների գորանոցի և բնակավայրի վրա: Նրանք 15-20 վայրկյանի հեռավորության վրա էին գորանոցից: Հայ կովոդներն անխորտակելի կամքով ծառացան թշնամու դեմ:

Այդ բարձունքի սեպ ժայռերի կատարներից մի քանի հերոսուհիներ խրոխտ ու առնական ձայնով բղավեցին. «Եղբայրնե՛ր, վրիժառու քաջե՛ր, գնդակ մը ես և վերջինը կըլլա այդ: Որովհետև թշնամին սկսած է խուճապի մատնվել: Զարկե՛ք, մի՛ մեղքնաք, գնդակ մը ես, և վերջինը...»: Հայ կովոդները կատաղած առյուծների նման խոյացան թշնամու վրա՝ ամեն կողմից մահ սփռելով նրա վրա...²⁴: Ուրախ աղաղակներ, և թշնամին խուճապի մատնվեց բռնելով փա-

²¹ Նույն տեղում, էջ 341:

²² Պուրսալեան Յ. Գ., Մուկտիոյ հերոսամարտը, էջ 69:

²³ Նույն տեղում, էջ 63:

²⁴ Նույն տեղում, էջ 68:

խուստի ճամփան: Հաղթությունը կատարյալ էր: Մահվան բլուրն ազատագրված էր: Այսպես ավարտվեց երրորդ մեծ կռիվը: Այստեղ թշնամին տվեց 800 սպանված և ավելի քան վիրավորներ:

Մուսալեռցիներն ունեցան 14 սպանված և 6 վիրավոր²⁵:

Երրորդ կռվից հետո թշնամին համոզված էր, որ սննդի և ռազմամթերքի սակավությունը կստիպի մուսալեռցիներին անձնատուր լինել: Հայերը հույսները չէին կտրել ծովից եկող օգնությունից:

Մուսալեռցիները դաշնակիցների հետ կապվելու շատ փորձեր կատարեցին: Օգոստոսի 12-ին Մովսես Գրբերգյանին օգնականներ տալով՝ աղերսագրի երկրորդ օրինակը ուղարկեցին Հալեպ և Իսկենդերունի շրջանը այն հույսով, որ մարտանավի կհանդիպեն և աղերսագիրը կհանձնեն: Այդ խումբը մի քանի օր մնալուց հետո ապարդյուն վերադարձավ:

Սեպտեմբերի 2-ին ծովի վրա մարտանավ է երևում. ժողովուրդը հավաքվում է Տավաճըզի բլուրի վրա: Թափահարում են սպիտակ դրոշները, խարույկներ վառում, բայց նավը անտարբեր հեռանում է: Սեպտեմբերի 5-ին առավոտյան ծովի վրա մարտանավ երևաց, որն սկսեց մոտենալ ափին: Մարտանավը, նկատելով նրանց, խարիսխ գցեց, մակույկ ուղարկեց, ծովափին գտնվող պահակներին վերցնելով՝ նավ տարավ՝ հանգամանորեն տեղեկանալու ամբողջ եղելությանը: Դա ֆրանսիական «Գիշեն» մարտանավն էր: Հերոսամարտի 41-րդ օրը՝ 1915 թ. սեպտեմբերի 13-ին, ֆրանսիական 5 մարտանավեր 4058 մարդ²⁶ վերցրին և ուղղվեցին Պորտ Սայիդ:

Մուսա լեռան ինքնապաշտպանությունը հայ ժողովրդի ազատագրական պայքարի փառավոր էջերից է, որն ավարտվեց հաջողությամբ: Այս պայքարում հավատարիմ լինելով հայ կնոջ հերոսական ավանդույթներին՝ լեռան բարձունքներում մուսալեռցի կանանց մի մասը, զենքը ձեռքներին, ամուսինների, եղբայրների, զավակների կողքին մարտնչում էր թշնամու դեմ, մյուսներն իրենց ուսերով կռվողներին ուսելիք, զինամթերք, ջուր էին հասցնում. կանայք, որպես գթության քույր, խնամում էին վիրավորներին, բուժում նրանց վերքերը, նաև կտրտում էին ծառերը, խրամատներ շինում: Նրանք ոգեշնչում, գոտեպնդում էին կռվողներին, մղում հերոսության:

Երկրորդ աշխարհամարտից հետո՝ 1946-1947 թթ., մուսալեռցիներից 700 ընտանիք (70 տոկոսը)՝ հայրենադարձվեց, հաստատվեց Էջմիածնում, Հոկտեմբերյանում: Մուսալեռցիների հերոսական պայքարին է նվիրված ավստրիացի մեծ գրող Ֆրանց Վերֆելի «Մուսա լեռան 40 օրը» գիրքը, որը թարգմանվել է աշխարհի բազմաթիվ լեզուներով:

Երևանից Էջմիածին տանող ճանապարհին է խոյանում Մուսա լեռան հերոսամարտին նվիրված հուշարձան կոթողը, որտեղ ամեն տարի՝ սեպտեմբերի վերջին կիրակի օրը, աշխարհի տարբեր ծագե-

²⁵ Սահակյան Ռ. Գ., *Ցեղասպանության պատմությունից*, Ե., 1990, էջ 181:

²⁶ Սահակյան Ռ. Օ., *Արևմտահայության ցեղասպանությունը և ինքնապաշտպանական կռիվները 1915 թվականին*, Ե., 2005, էջ 323:

րից հավաքվում են մուսալեռցիների ժառանգները. նրանք ավանդական հարիսա են եփում և ուրախությամբ, երգ ու պարով, թըմբուկ-շեփորի հնչյուններով նշում են հերոսամարտի օրը, հարգում զոհված հերոսների հիշատակը, հաստատում իրենց ինքնությունը հայրենի հողի վրա:

ГЕРОИЧЕСКАЯ САМООБОРОНА МУСАЛЕРА И АРМЯНСКИЕ ЖЕНЩИНЫ

ПАШИНЯН Р. А.

Резюме

30-ого июля 1915 г. каймакам Антиоха отдал приказ о депортации мусалерцев, согласно которому жители Мусалера в течение 7 дней обязаны были покинуть деревню. Более 6.000 тысяч человек приняли решение подняться на вершину Мусалера и подготовиться к вооруженному сопротивлению. Среди них были также женщины и дети. Наравне с мужчинами женщины с оружием в руках героически сражались с турецкими солдатами. Своей смелостью и отвагой особенно отличились Вардер Зейтлян, Цагер Тер-Мовсесян, Шушан Гапаян, Манушак Манукян (Ягубян), Егсапет Сагиян и другие.